

上元縣志

地 220.15

34

17-16



登錄號 續 13561

2 函 16 册

上元縣志

一九八九年元月江蘇
廣陵古籍刻印社據
清乾隆刊本影印

序

從來志書家合縣而為郡合
郡而為省則縣志實其蒞輒
職詳之與職要殊科也又况
天下雄藩以金陵為甲而金

序一

陵屬邑又以上元為最自六
代南唐以迄前明咸為京輦
其形勝區宇之廣人物材產
之夥禮樂政事之繁建置沿
革之蹟不可殫書如欲網羅

搜輯綜核靡遺憂乎難之然

自

本朝設省大臣駐節恭逢

聖祖仁皇帝六次南巡

翠華蒞止

序二

宸翰金章炳丹青而昭金石者

所在皆是茲又恭逢我

皇上繼志述事定於今年春

鑾輅親臨採風察俗凡以備掌

故而供酬荅者端有藉夫縣

志於是上元令藍君克勤其
職修舉廢墜樂事勸功既已
晷刻不遑而又出其游刃之
智抒夫製錦之才博叅載記
招集文儒排編新志始事於

序三

庚午之春歲事於嘉平之末
以予忝備觀察書成亟來請
序予細加緝閱見其條理井
然考訂精確門類具舉踈畧
無虞將後之徵文考獻者必

有取於斯焉爰樂得而弁其
簡端云

昔

乾隆十六年辛未孟春之吉
賜進士出身整飭江南通省驛

序四

傳益法兼巡江寧道紀錄四
十二次關中周承勅撰



序

客秋余攝郡篆會上元
令藍君重脩色志開局
草堂橋畔延二三紳士
相與考文徵獻越七月

序一

而書成彙帙送閱而請
序於余夫志猶史也周
禮外史掌四方之志以
上之於王春秋時列國
皆有史左邱明據當世

時事佐傳以與麟經相
比附他如晉之董狐楚
之倚相弼稱良史沿及
兩漢司馬遷承公談太
史之職創為紀表書傳

序二

為史家體例班固易八
書為志猶曰志國史之
一體耳至陳壽紀三國
則統名之為志而編者
列於二十一史之自然

則志與史固名異而實
同也雖一邑所載較郡
國為簡省而星野疆域
山川名勝沿革事蹟以
及官師選舉人物藝文

序三

之屬條分縷析殊非易
易况上元為會城首邑
歷朝建設都社猶存經
羅遺文不可勝述我

國朝重熙累洽景運日隆

治化茂騰人文蔚起即
此百餘年內標舉盛美
卓尔不羣若無健筆鴻
裁安能撰次至當以與
前志爭駕而藍君毅然

序四

任之採之博擇之精敘
之詳核之實高文典冊
直與列朝信史相為輝
映而有光舊乘又不待
言已夫君子之經世也

務其遠者大者賈誼曰
俗吏之所為在乎刀筆
筐篋而不知大體以此
見藍君志在遠大吏事
本於經術豈百里才所

序五

易參及者哉抑余更有
慶焉今歲春月

聖天子翠華南幸方將駐蹕
上色流覽雄區憑山控
江俯仰今古而是志屆

期告竣及以表圖經而
備掌故此實千載一時
之嘉會不可不恭誌之
以昭示來茲也是為序
乾隆十六年歲次辛未

序六

孟春之吉署江寧府知
府事理事同知長白蘇
凌阿撰



序

乾隆己巳之冬

制府大人黃公檄兩江脩邑志
將以回天察地體國經野求
斟酌損益之宜折衷掌故昭
示來茲甚盛舉也襲承乏上

序一

元任劇事煩蚤夜淬厲深慮
弗克負荷甫三月而檄適至
爰稽邑乘修於康熙己亥閱
今三十有二年無論棗梨剝
蝕殘缺貽譏即都人士女涵
育於

聖化之深者月異而歲不同不為
表彰浸以湮沒及今不脩實
切奉職無能之懼而會城紳
士咸願醵金以佐余之不逮
深嘉其同志之多也用是開
館草堂橋之上乘庵簿書之

序二

暇偕何君夢篆退夫暨二三
博士弟子居今稽古審異致
同覃乃精力不敢告勞閱七
月而書成余惟志之作始於
春秋時列國晉之董狐楚之
左史倚相其作者也漢司馬

遷史記創為紀表書傳體例
一新班孟堅易八書為天官
禮樂等志則又志之濫觴也
國朝康熙中各直省督撫纂脩
通志上之政府以大一統而
昭無外矣顧念上元古禹貢

序三

揚州之域分野在星紀之次
田賦厥土為塗泥而世凡數
變明初官田免租民田減租
之半正嘉之季勸借頻仍里
甲坊廂為害滋甚藉非條編
法立其何以瘳田制既定學

校聿興應天省縣入府
國朝增置兩縣學追封崇祀典
禮攸隆選舉遞廣解額科貢
之外薦舉兼行自是而人物
出矣詳分品類首祠賢曰其
生之賢而祠之祀之也次邑

序四

獻鄉先生沒而祭於社也又
次宦籍曰其宦遊而占籍焉
又次治績邑之人筮仕他郡
邑而賢且能者也至如文學
忠節孝友義行世教克端凡
民興行惟民有四藝術其一

而方外亦於教之外覘盛衰也藝文聖賢之心胸散見於學士大夫之口則以撫佚終焉若乃揚賜蠲之恩澤發喬翕之光華恭載首卷竊比于史記漢書之帝紀余愧不能

序五

文至於叅稽考訂信今傳後或可備採風問俗之一助云爾

乾隆十六年歲次辛未孟春之吉知上元縣事韓江藍應

襲誤



後序

明代上元縣志終於程公三省而邑人李登載筆焉當是時條編法雖行而邑之坊廂里甲諸弊枝蔓未除作志者其有憂患乎我

國家龍飛景運督撫大吏勤宣令德以達下情守土之長砥礪廉隅噢咻百姓前令遂寧唐公哀然創始焚篆會贊一詞

後序一

今 藍侯以孝廉文吏膺

天子簡命而來興賢育才體國經野汲汲謀所以修縣志者會城紳士亦遂嚮風慕義爭先佽助以請於

列憲

篆

用是不獲辭七閱月書成越明年

翠華南幸外史呈一方之志於山川見扶輿之清淑於風土見士女之淳龐於上下古今忠臣良吏義夫節婦沐浴於大順

大化者見貞元之會合而從事耳筆之
臣潤色休明鼓吹大業以視昔之人感
遇流連廢書三歎其人代之榮悴時事
之迫舒相去爲何如也抑又因之有念
矣篆先世蜀人自曾王父待御占籍金
陵邑之有志一再修焉知罪付之不問
獨是通籍後承乏嶺南較坡公七年來
徃不啻倍之顧以新安海隅僻陋文獻
無徵曾不得討邑乘而蒐輯焉聞 藍
侯之風其亦重自愧也已

乾隆十五年嘉平月

賜進士出身內府中書科中書舍人前知
廣東新安縣事邑人何夢篆序時年七
十有八

後序一



上元縣志舊序

我聖祖高皇帝受天明命奄有四海天下既平乃定鼎於南畿首設郡邑以圉羣黎而應天寔爲首郡上元實爲首邑迄今百五十餘年禮樂制度典章風化赫然盛備且天下藩郡州邑莫不有志以紀一方形勝人物風俗而應天上元爲天下首郡邑而志尚未修舉誠有司之缺典也訪之前輩尹京兆者選選常有意於此屢興而屢止竟弗克就議者以爲應天在都城之內朝廷宮闕宗社在焉未敢輕爲言述故遲遲至今近歲毘陵白尹圻嘉定龔尹弘何陰許丞庭

上元縣志

序

一

光前後而來皆以此事爲急務而欲舉行且以朝廷頒行大明一統志爲可依據乃託鄉彥徐霖張宏陳沂管景輩五七人設局於府庠後堂編輯餘歲稿再脫又各以轉陞去任而卒不能成其美今山西寇丞天敘來治應天適朝廷有旨取應天府志乃取昔日纂修將成之稿仍託霖等重加修飾成集進上惟時平定白尹思齊膺薦來宰上元下車之初聞府志旣成乃不遑寧處以景嘗與修志遂延至公所披摭前圖史文冊尋訪古今事蹟編輯數月將稿適遇今上親率六師用討不庭駕留南都百官有司奔馳奉迎

營辦軍需夙夜無休息之時而斯事又且停止餘十
月罪人斯得王師奏凱聖駕北上始得休暇乃取編
輯前稿重加訂正命工繡梓白丹以某爲邑人知事
頗悉徵予序諸首余不能以老髦辭乃取其已成之
集而閱之其類有十一曰圖表二曰疆域三曰山川
四曰建置五曰版籍六曰祠宇七曰宮室八曰古蹟
九曰紀錄十曰摭遺率遵程式不敢加私智於其間
其用舍取予亦皆遵府志已成之集而爲之未嘗有
所更易誠足以備一邑之所未備也志旣成余何敢
置喙於其間唯述志之已成未成之顛末如此將俟

上元縣志

序

二

採國史之柄者採焉

正德辛巳春正月望日按察副使沈庠撰

後序

金陵今爲應天府大京在焉上元爲府首縣正德戊寅思齊領部檄來知縣事惶懼謏薄不堪因而圖覓縣志欲豫諳其風土民俗泊前令宦績可法者博訪無所得比至任始知縣舊無志適府有修志之舉竊自喜曰府志畢縣志其易成乎明年庚辰伏遇皇上南征逆藩駐蹕金陵有司以職事奔匍倥偬無晷刻暇息奚以鉛槧爲哉及其渠魁授縛六師凱還又有旨取郡邑之志臣工莫不鼓舞觀呼咸謂偃武修文聖君御世之道天下其有幸矣思齊尤私喜其縣今

上元縣志

序

三

有志也卽延府庠生管景於邑稔知其雅博故託焉旬再浹而志成志成可喜也又慮其公帑空竭刻資無出遂倡同寅各捐奉薪以協贊乃成志已刻可喜也或者有言上元江寧並峙京都事多互錯宜慎事毋徒作木之殃思齊聞之猶豫亟取成集再加檢閱其發凡舉例悉遵一統志式而地界因革亦皆有據不謬且知邑之官增品秩民減賦租皆我聖祖加惠赤縣而然誠異典也他如里社有學卽三王小學之制養濟有院卽岐周惠鮮之仁並歷歲遠廢弛正思齊講求而未得者今志悉著之其爲有益於縣也固

不遑與

正德辛巳春正月知縣白思齊撰

上元縣志

序

四

上元縣志舊序

上元古金陵自諸葛武侯稱爲天府之國孫吳寔始都焉六朝嗣起文物勃興而規模建立未離偏霸至我太祖高皇帝藉江左之力奄甸六合定鼎於斯雖一再世徙都北平而二京並建與豐鎬爭烈非復六朝之舊矣顧其因革盛衰之際載於典冊者自南徐州記丹陽記以下若景定建業志金陵新志各有所明入國朝陳太史魯南撰南畿志金陵世紀陳中丞宗之撰金陵人物志于邑未有專述萬歷壬辰邑侯程公三省謂神州赤縣文獻甲天下而志獨闕如無

上元縣志

序

五

以備考覽存法式也乃屬鄉先生李公登文學盛君敏畊陳君桂林攬衆說撫遺事芟繁取要而成此書若夫地理文學祠祀食貨兵衛與夫良吏名人忠義孝友高行隱佚儒林文苑靡不備載而列女方伎若事之不可吐棄者咸附焉摠之爲若干卷於是數百里之內二千載之間其事可按書而得矣程侯將刻而傳之以余爲都人與聞其事請序於首簡余以謂先王之政辨疆域程土方稽俗尚慎封守靡匪以適治而已顧興敗之由其來以漸苟非早見而力挽之則莫之能救若是書所載其龜鑑也何者吾觀其戶

口則由登而耗賦役則由省而繁財費則由縮而贏
吏治則由良而窳人才則由寔而虛物力則由富而
貧民俗則由醇而薄降本流末何莫不然斯非人牧
所宜加意耶宋元祐間伯淳先生爲邑簿如國史所
紀稅均訟簡與夫脯龍池之神物折道旁之黏竿事
甚微淺迺邑之人瞿然順化俎豆至今以余所睹記
嘉靖中程公燦恩施甚厚百姓歌之今志成復屬之
侯蓋有造於是邦者先後五百年而皆出程氏何其
盛也藉第令爲民父母者皆若而人卽國家豐鎬萬
年之盛將永永是賴非獨爲一邑計而已余嘉諸君
子發凡証例以筆削爲已任又睹侯之審於政體能
知所重而亟圖之也故樂書之俾後之覽者知轉移
之機厥有所寄必憬然而寤者焉

萬歷癸巳秋九月邑人焦竑弱侯書

後序

君子之愛民也深故其垂澤也久不圖一時之治平而猶思有以遺其後真如父母之燕翼其子而且貽之孫謀如是者莫良於志夫志者識也考諸前以俟諸後之謂也維茲上元爲陪京首邑官府交錯公私鞅掌祈目前平治昔賢常難之矧貽之後耶我父母先生確菴程公往令豐邑嘗以治安之餘重修邑志迨今豐邑世取爲則暨遷是邑則首詢邑乘知其作於正德之季自嘉靖以來時易事更厥故不勘廼闕焉未載卽有意續修嘗以屬登而當其時公固未遑

上元縣志

序

七

而登亦未敢承也暨三載考績復任則精明益徹法行自近百廢具興弊孔悉杜而猶欲遺其畫一之意於方來乃決意成之倡論於不肖而登則不可辭矣於是援同志文學盛君敏耕陳君桂林二君博雅足裨不肖謏陋三卷以下多二君之力登司校勘而已迨脫稿而程公內擢地官以去遺貲以命剗劇繼者梧藤孫父母先生廉明慈厚洵能與前人協心底治矧今司牧自京兆以上咸詢民瘼爰竟刻之刻成登奉往論敘其後曰凡志有三要焉一曰紀政二曰觀風三曰攷藝夫洪範食貨大學理財固政理所先也

操一邑盈縮之數以御出納之常一有不察中蝨而外竄故爲政者首謹於是此程公本志也至於采風陳詩固司牧者常資之爲化理之助而宇內人士齒及敝邑動以東晉六朝目之而來游來歌者尚拾昔慨嘆之餘唾夫以殷人舊染至周維新秦人樂戰迨漢醇厚均是民也顧化之所漸何如耳洪惟我聖神定鼎于斯聖神殫治敦信黜浮而都人首順其化故其遺民老成輩出載在志中者可按覆也嗣是清談之風易而爲敦大奕棋之勢奠而永安今不曰豐芑之遺休而曰六朝之故習不曰卷阿之餘韻而曰江

上元縣志

序

八

左之風流此非僕之所敢知也且龔遂在齊尚革佩刀之習文翁治蜀鬱爲文學之邦彼一守宰而猶若是矧被聖神之漸摩者乎第消長之機惟在所養所冀後之君子撫我聖祖之遺黎思我昭代之首化長少協心同登之治俾克稱曰京邑翼翼四方之極是灌灌之永言也夫是灌灌之永言也夫

萬曆二十有一年癸巳除前十日知河南新野縣事

邑人李登撰

上元縣志原序

竊聞之成周職方氏掌天下之圖外史掌四方之志志之所由來也遠矣故夫志者典之則也政之經也文獻之考據也是以披輿圖而知山川之險易稽版籍而知戶口之盈縮省風俗而知民志之淳漓覈賦稅而知征輸之緩急審學校而知士氣之興衰與文運之升降覽前人之政蹟可以景仰餘徽攷先賢之德業可以私淑遺範至若貞閨列女亦爲風化之原本志之攸關於治理不綦重哉紫陽朱夫子守南康首問郡志大儒爲政且汲汲於斯况其下焉者乎開

上元縣志

序

九

聖恩簡授上元令上元古之金城也自漢以來爲六代建都之所有明一統亦開國於茲迨我

朝江南爲十四省之冠冕江寧府爲之會上元府之首邑也地之衝繁民之殷庶簪纓之赫濯風俗之華藻甲於海內莅斯土者簿書期會折獄催科日不暇給遑問邑志故自萬歷中季迄今百有餘年闕焉纂修開陶才雖謏劣頗知邑乘與吏治相表裏不敢不從事于斯而尤爲重大者

聖天子南巡會一再臨幸

邑之學士大夫知幸生盛世

聖天子所以度越前代者止在輕徭薄賦而後不敢以金粉衣冠侈談佳麗焉與夫蒐討陰陽流泉網羅風雲月露蔚宗作史獎及文姬柳州紀遊集登鈇鉏其關係大小何可同日而語哉然是書也唐君治邑三年乃敢議修修經年乃告竣夫欲綜利弊以告後人而不自知其利弊可乎閱百年而始一修而欲速成於一旦可乎拊循而民宜之諮諏而衆應之志成而唐君之治行亦可見矣江寧府志修於康熙六年以時亦當再修惜余方疲簿書未敢輕議及此也後賢有

上元縣志

序

十

作其毋忘以唐君斯志爲嚆矢也夫

康熙六十年歲次辛丑仲冬之吉知江寧府事吳應鳳譔

上元縣志原序

凡邑必有志而志大邑與志小邑不同山川風土之在窮荒僻壤者不志不傳也上元爲江寧首邑顧盼所及罔非六朝遺跡卽不志猶將傳顧代經鼎革運值昇平山川猶是氣象日新風土依然時尚各別以及制度之沿革文獻之存亡不可以不志者也上元志修於萬歷末年間歷今百餘載邑宰唐君始慨然以重修爲己任書成示余余觀明季自萬歷以後上帝假寐昏椽肆焰事勢土崩尚欲踞一隅以張螳臂民生此地遭荼毒不可言矣本朝聿興改絃更張一切盡從寬大而是邑一迎

上元縣志

序

十一

王師卽沐膏雨近年

天子省方屢次駐蹕蠲丁免稅著爲令甲有窮荒僻壤所不敢望者距萬歷修志時不二百年間而陳跡已非乾坤另闢上元一邑之盛衰天下之治亂係焉唐君修是書於山川勝蹟風土物宜災祥藝志踵事增華潤飾而已獨於戶口之贏縮征徭之煩省人物之淳澆前朝所以亡而本朝所以興者考之必精紀之必詳使後之宰是邑者知

聖天子八十年休養生息以有此民而後不敢虐用焉使

聖訓宸章煥若日星凡屬臣工凜遵敬之載之方策永爲
百世典章猗歟盛哉爰延邑之名儒設館於冶山之
麓諮訪舊聞蒐羅佚事首重名宦先賢次則士風文
藝至於明季程宰所遺舊志無庸更易者因之有所
變通者損益之統計二十有四卷雖然志與史異派
而同源先民有言良史難良志尤難開陶之鄙意竊
恐舊乘久而失傳新志更不編次文獻遂至無徵豈
非守土者之責與若夫鐵筆裁正尚有俟於後之君
子

康熙六十年歲次辛丑知上元縣事遂寧唐開陶撰

上元縣志

序

十一

上元縣志

編校姓氏

何夢篆 退夫

程廷祚 綿莊

孟志韶 音諧

甯楷 端文

孟起鵬 扶萬

陳文炳 澤先

林燦 梓園

談羽儀 毓奇

上元縣志

編校姓氏

嚴臺 珂法

何士架 季方

楊愈 中山

何應乾 惕行

監修姓氏

藍應桂 芷林

王鎬 豐源

上元縣志凡例

一全書首二紀中十志終撫佚共爲卷三十爲目八十

一各志前有序序所以爲作之意其他辨論考訂隨條附入庶幾文省事增

一我

朝久道化成歲時蠲賜上元江南首邑

帝念尤深大澤洵屬無私而容光特爲專紀

一自康熙二十三年至四十八年乾隆十六年

聖神翠華屢幸上元實駐蹕之所例得大書

上元縣志

凡例

一王治求端於天自昔推步之學惟我

朝最爲精密康熙中

御定皇輿全圖以里差準北極高度極度定而一方之節

候農事之早晚其故靡不昭晰近日漢陽府志

創立此表洵能闡明

聖制今特倣作至星野舊說雖未能詳仍存而不廢云

一建康舊屬名都昔賢攬勝搜竒向有四十景圖

載於郡志但近日互相誇耀強標名目遺笑邯

鄲今唯紀巨鎮通川以志形勢別立山龍一圖

發凡自句邑志中

一韓獻子論新田曰有汾澮以流其惡青溪秦淮金陵之汾澮也慨自南唐改築城垣青溪斷滅前明大建都城水道遷徙迄今湮塞日甚疏濬維艱非旦夕所能奏効故宋史河渠志卽載張孝祥汪澈諸公之說明代議論尤多今於是書亦復三致意以俟後之君子

一邑有賢令而教養之事克舉故天官輿地之後卽列官守從所重也

一民賦謹據乾隆九年

欽頒賦役全書編叙簡明以備省覽

上元縣志

凡例

二

一學校王者所有事也依省志例卷前恭紀

欽頒卧碑及

三朝上諭

天語煌煌垂訓萬世所以重其制也餘志槩不敢登

一制科三年一次每入翰林先別科分後輩莊啓爲贊罔敢稍渝非如秩官但紀姓氏而不事表年也仍照舊志作選舉表

一史家有單傳有合傳有分別流品如文學治績忠烈孝義等則各以類爲傳今專倣通志分類從近體也若其上下古今得失哀數傳以爲一

論俾攷古者見賢思齊或亦知人論世之一助
云

一傳不及生存俟論定也惟節婦已奉

旌表特以義起其他年例久符因貧待

旌者採編卷內

一山川古蹟古來游覽名作原自無多後人依類
附載每至冗濫今略爲區別與前賢撰著有關
地方利病古今得失者并入藝文至考議等文
間有一二附載卷後所以闡明卷中未盡之意
非自紊其例也若乃聞見不廣搜討未脩踈陋

上元縣志

凡例

三

之譏夫又何辭

上元縣志目錄

卷首

國朝蠲賜恩紀

聖祖南巡恩紀

今上皇帝南巡恩紀

卷一

天官

星野 極度 庶徵

卷二

輿地 上

上元縣志

目

沿革 圖說

卷三

輿地 中

疆域 城池 廨署

卷四

輿地 下

山川 形勢 風俗

卷五

官守 上

歷官

卷六

官守下

良政 封爵附

卷七

民賦上

戶口 田制 地租 蘆課 雜稅 鹽引

卷八

民賦下

積貯 蠲賑 物產附

卷九

上元縣志

目

二

學校

宸翰

儒學 廟祠 禮樂 經籍 學田 學額
府學以下附 書院 社學

卷十

選舉表

卷十一

祠祀上

壇壝 廟宇

卷十二

祠祀下

寺觀附

卷十三

古蹟上

都邑 宮室 郊廟 庠序 官舍 倉庫

苑囿

卷十四

古蹟下

樓閣 亭臺 堂軒 柵埭 村驛 第宅

陵墓 碑碣

卷十五

上元縣志

目

三

人物

祠賢

先賢祠祀 表忠祠祀 名宦祠祀

卷十六

人物

邑獻

卷十七

人物

宦籍

卷十八

人物

治績

卷十九

人物

文學

卷二十

人物

忠烈

卷二十一

人物

孝友

上元縣志

目

四

卷二十二

人物

義行

卷二十三

人物

隱逸

卷二十四

人物

方技

卷二十五

人物

列女附

卷二十六

藝文上

表 疏 啓 記 序 贊 銘 論文

卷二十七

藝文下

賦 詩 辨 議 考

卷末

撫佚

上元縣志

目

五

上元縣志卷首

蠲賜

國朝蠲賜恩紀序

嘗讀楚茨大田諸詩先儒以爲邠雅何也甫田之首章曰俶彼甫田歲取十千我取其陳食我農人甫大也言大田之稼歲取供上而還以歲之供給之民也大田之三章曰雨我公田遂及我私冀怙君德天有以雨公而因逮其私也蓋其時風俗醇美上下相親故力農邠俗也而詞旨深厚有王民熙皞之意蓋已颯颯乎進於雅矣故曰邠雅

國朝

上元縣志

卷首

蠲賜

一

列聖相承烝民乃粒其家給戶賜者無歲不有無時不然康熙二十七年邑之紳士耆民哀資建萬壽閣於雞籠山之巔以紀

聖祖之湛恩大澤

今上皇帝率

祖攸行罔敢或懈邑民走相告曰一年之間我

皇東巡岱宗西巡華岳是心乎民者也殆將及我因念乾隆十年輪蠲各直省田賦率五年期滿亦猶

聖祖求寧之意也爰白諸大府庀材鳩工兩縣紳士相視建亭於雨花臺之麓額曰

皇恩浩蕩蓋

聖祖

神孫後先濟美而邑民之幸生其際者以視楚茨大田君民之相親愛豈有二致哉孔子曰如有王者必世而後仁

國家重熙累洽百有餘歲以此思仁仁可知已上元縣

知縣 臣藍應襲 謹拜手稽首恭志

國朝蠲賜恩紀

上元縣志

卷首

蠲賜

二

上元縣志卷首

蠲賜

蠲賜一

順治二年

詔曰光岳合而泰階平南北一而兵爭息越稽往古靡
不同符本朝立國有年幅員既廣醇朴爲治無意并
兼疆場構兵本欲言歸於好不期寇凶極禍明運永
終於是整旅入關代爲雪恥猶以賊渠未殄不遑起
居隨命二王誓師西討而南中乘釁立君妄僭尊號
罔聞國郵亟行亂政重困民氓負四海不義之名阻
東南向化之路朕用是夙夜祇懼思救焚黎故西賊
上元縣志

卷首

蠲賜

一

既摧旋行南伐上託

祖宗之休烈定國大將軍豫王扶義而東兵無頓刃河
南江北次第歸誠甫克維揚隨平江左金陵士女昭
我

天休既獲福藩南土略定從此輕徭薄賦可漸進於昇
平將來制度考文冀徐興於禮樂朕念峻命之不易
悼斯民之孔艱深切痼瘼宜矜誑誤特弘大賚嘉與
維新

順治十四年

欽頒賦役全書



朕惟古帝王臨御天下必以國計民生爲首務故禹貢則壤定賦周官體國經野法至備也當明之初取民有制休養生息至萬歷年間海內殷富家給人足及乎天啟崇禎之世因兵增餉加派繁興貪吏緣以爲奸民不堪命國祚隨之良足深鑒朕荷

上天付託之重爲生民主一夫不獲亦疚朕懷凡服御膳羞深自約損然而

祖宗百神軍旅燕饗犒錫之繁以及百官庶役餼廩之給罔不取之民間誠恐有司額外加派豪蠹侵漁中飽民生先困國計何資茲特命戶部右侍郎王弘祚

上元縣志

卷首

蠲賜

二

將各直省每年額定徵收起存總撤實數編撰成帙討稽徃贖叅酌時宜凡有參差遺漏悉行駁正錢糧則例俱照萬歷年間其天啟崇禎時加增盡行蠲免地丁則開原額若干除荒若干原額以萬歷刊書爲準除荒以覆奉御旨爲憑地丁清核次開實徵又次開起存起運者部寺倉口種種分析存留者款項細數事事條明至若九釐銀舊書未載者今已增入宗祿銀昔爲存留者今爲起運漕白二糧確依舊額運丁行月必令均平腴襖盜甲昔解本色今俱改折南糧本折昔留南用今抵軍需官員經費定有新規會

議裁冗改歸正項本色絹布顏料銀硃銅錫茶蠟等項已改折者照督撫題價值開列解本色者照刊書價值造入每年督撫確查時值題明填入易知單內照數辦解更有昔未解而今宜增入者有昔太冗而今宜裁者俱細加清核條貫井然後有續增地畝錢糧督撫按彙題造冊報部以憑查核綱舉目張勒成一編名曰賦役全書頒布天下庶使小民遵茲令式便於輸將官吏奉此章程罔敢苛歛爲一代之良法垂萬世之成規雖然此其大略也若夫催科之中寓以撫字廣招徠之法杜欺隱之奸則守令之責也正

上元縣志

卷首

蠲賜

三

已率屬承流宣化覈出納之數慎那移之防則布政司之責也舉廉懲貪興利除害課殿最於荒墾昭激揚於完欠恪遵成法以無負朕足國裕民之意則督撫之責有特重焉其敬承之母忽

蠲賜二

康熙二十六年十一月二十六日

上諭戶部朕惟自古帝王統御萬方又安九有單心懷保節愛攸先期於物力充裕爰以振業黎元俾膏澤旁流咸蒙美利朕自御極以來軫恤民依力圖休養惟理財爲裕國之大經蠲貸爲愛民之實政歷年敦

崇節儉嚴核浮冒蓋欲爲布德行惠之資頻年以來各省錢糧雖已次第蠲免但江蘇所屬各郡縣爲財賦重地額徵錢糧甲於他省且累歲輸將供億効力維勤茲用大沛恩膏除漕項錢糧外所有康熙二十年應徵地丁各項錢糧俱著蠲免二十六年未完錢糧亦悉與豁除又陝西省錢糧前雖已行蠲免但念該省人民用兵之際轉輸餽餉効力可念再宜加恩以弘樂利其康熙二十七年應徵地丁各項錢糧及二十六年未完錢糧亦著俱與蠲免爾部速行該地方官通行曉諭務使均霑實惠以副朕愛育蒼生上元縣志

卷首

蠲賜

四

至意如有不肖官吏借端朦混及私行重徵者該督撫指名題叅從重治罪如該督撫徇隱不行糾舉或經叅奏或被告發定行一併從重治罪爾部卽遵諭行特諭

康熙三十年十二月初四日

上諭戶部朕撫馭區宇三十年以來早夜圖維惟以愛育蒼生俾咸臻安阜爲念比歲各省額徵錢糧業已次第蠲豁其歲運漕米向來未經議免朕時切軫懷所有京通各倉米穀搏節支給數載於茲今觀歷年儲積之粟恰足供用應將起運漕糧逐省蠲免以紓

民力除河南省明歲漕糧已頒諭免徵外湖廣江西
浙江江蘇安徽山東一應漕米著自康熙三十年始
以次各蠲免一年至江寧京口杭州荊州大兵駐防
地方亦應豫行積貯著將康熙三十一年起運三十
年漕米各截留十萬石存貯倉廩令該地方官敬慎
守視以備需用爾部卽遵諭行特諭

康熙三十八年三月十三日

上諭戶部東南爲財賦重地朕時加軫念頻年以來雖
在邊塞用兵之際未嘗不早夜殷殷瞻懷寬恤茲以
中外昇平特事巡省並閱河工比至江南親察民間

上元縣志

卷首

蠲賜

五

饒瘠之狀見淮南北地方疊罹水患深用惻然已經
屢蠲屢賑仍命截留漕糧減價平糶其餘各州縣固
市肆安輯耕鑿恬熙而額賦浩繁民生拮据歷年逋
負積算日增合行江蘇巡撫安徽巡撫所屬舊欠帶
徵錢糧計及百萬念小民方供新稅復急舊逋物力
維艱勢難兼辦里井旣多催科之擾官吏復滋叅罰
之煩應沛特恩槩行蠲豁除康熙三十三年恩詔內
已經赦免外其三十四五六年奏銷未完民欠一應
地丁錢糧米豆麥雜稅爾部行文該督撫察明俱著
免徵務飭有司悉心奉行俾使窮簷蔀屋均霑實惠

如有已徵在官詭稱民欠希圖侵蝕肥已者一經發覺定從重治罪朕身處宮禁與巡歷方隅無非孳孳民事但使閭閻豐足則國家裨益良多以此不惜蠲除頻敷德澤凡厥官吏軍民宜咸知朕意爾部卽遵諭行特諭

康熙四十六年十一月初二日

上諭戶部江浙地方賦役殷繁倍於他省朕屢經巡歷時切軫懷比年以來業已節次敷恩類行蠲免頃因兩省偶被旱災隨命按數減徵豁免漕欠並分截本年漕糧令該督撫親往散賑猶念民間素鮮儲蓄生

上元縣志

卷首

蠲賜

六

計不充非更加格外滋培則荒歉之餘未能驟臻康阜茲特再施膏澤用弘休養康熙四十七年江南浙江通省人丁共額徵銀六十九萬七千七百餘兩著悉與蠲免其今年被災安撫巡撫屬七州縣三衛江寧巡撫屬二十五州縣三衛應徵地畝銀共二百九十七萬五千二百餘兩糧三十九萬二千餘石浙江二十州縣一所應徵地畝銀九十六萬一千五百餘兩糧九萬六千餘石四十七年亦俱著免徵所有舊欠帶徵銀米並暫停追取俟開徵時一併輸納務使小民一歲之內絕跡公庭安處隴畝俾得優游作息

經理農桑庶幾閭閻氣象可以日加豐豫諭旨到日該督撫體朕孳孳惠愛黎元至意各飭有司實心奉行仍張示通曉令咸知悉倘蠲除不實致有侵冒察出定治重罪爾部卽遵諭行特諭

康熙五十一年

上諭戶部朕宵旰孜孜勤求民瘼永爲惠下實政無如除賦蠲租除每歲直省報聞偶有水旱災傷照輕重分數豁免正供仍加賑卹外將天下地丁錢糧自五十年爲始三年之內全免一週使率土黎庶普被恩膏除將直隸奉天浙江福建廣東廣西四川雲南貴

上元縣志

卷首

蠲賜

七

州及山西河南陝西甘肅湖北湖南各直省康熙五十年五十一年地丁錢糧一槩蠲免歷年舊欠錢糧一併免徵外所有江寧安徽山東江西各撫屬除漕項外五十二年應徵地畝銀共八百八十二萬九千六百四十四兩有奇人丁銀共一百三萬五千三百二十五兩有奇俱着察明全免其歷年舊欠銀二百四十八萬三千八百二十八兩有奇亦並着免徵計三年之內總免過天下地畝人丁新徵舊欠共銀三千二百六萬四千六百九十七兩有奇各該督撫務須實心奉行體朕軫念民生至意如有侵欺隱匿使

惠不及民借端科派者督撫嚴行察叅督撫失察事發之日亦嚴加究治諭旨到日立即徧示城郭鄉村咸使知悉爾部卽遵諭行特諭

康熙五十六年

上諭戶部朕撫馭寰宇五十餘年夜寐夙興爲小民勤求生遂凡率土遠近皆期共享樂利聿成家給人足之休未嘗一日不厯諸懷也數十年以來各省正賦屢經全免歷年積欠亦已蠲徵偶有兩澤愆期或發倉廩散給或截漕糧賑救不惜數萬萬金錢米穀頻沛恩施誠念窮簷之艱慮其至於顛連失所耳近者

上元縣志

卷首

蠲賜

八

民力雖已稍紓然念分年帶徵銀兩若不格外優寬則小民一歲所獲分納二年之賦以其贏餘養贍室家斷難充足朕每懷及此軫惻良深宜更加殊恩通行豁免今將直隸安徽江蘇浙江江西湖廣西安甘肅等八處帶徵地丁屯衛銀二百三十九萬八千三百八十兩有奇槩免徵收其漕項雖例不准免亦着破格施恩將安徽江蘇所屬帶徵漕項銀四十九萬五千一百九十餘兩米麥豆一十四萬六千六百一十餘石內蠲免各半爾部卽行文該督撫嚴飭所屬實心奉行徧加曉諭俾民間無徵催之累均沾實惠

用稱朕撫卹羣黎至意倘有不肖有司借端朦混私行徵收者該督撫嚴察叅處如該督撫失察一併從重處分爾部卽遵諭行特諭

蠲賜三

雍正元年三月二十五日江蘇巡撫奏請寬免蘆課等項銀兩奉

上諭江蘇等屬民欠地丁等項銀一百三十一萬餘兩內蘆課等項銀九萬八百兩零雖非恩詔內應行豁免之項但此事歷年最久倘行催徵窮民必致受累著一併豁免

上元縣志

卷首

蠲賜

九

雍正元年七月二十八日戶部以蠲免項內蘇太屬下衛所舊欠屯折等項錢糧請

旨豁免奉

上諭未完屯折銀二萬四百九十餘兩內存留俸工銀一千二百九十餘兩雖不應豁免此事歷年已久該撫旣稱實係拖欠在軍著一併豁免

雍正十一年五月

上諭上年江蘇等處被水州縣朕已降旨多方賑濟今春又復添賑四十日以加惠貧民茲當徵收錢糧之時其被災稍重之處遙念小民輸課未免艱難著該

督撫秉公確查將應行緩徵之州縣奏聞緩徵待至秋成再令完納以紓民力以廣國恩特諭

雍正十二年十月十一日內閣奉

上諭今年六月間江蘇地方雨水稍多州縣低窪之地有被水淹沒收成歉薄者朕心軫念且恐將來米價漸昂不可不預爲籌畫著將乙卯年江南起運漕糧截留二十萬石於被水成災之州縣各就近留一萬石或五六千石於被水不成災之州縣量留三四千石俟開春市價增長之時將此平糶以便民用其成災田地應徵新舊條銀若仍行徵輸小民不無竭蹶

上元縣志

卷首

蠲賜

十

著緩至來年麥熟開徵再本年應納南漕等米亦緩至明秋折納所有被災地方無力之食之窮民應動支倉穀分別賑濟毋令失所該督撫悉心辦理并督率有司實力奉行務令均霑恩澤欽此

蠲賜四

雍正十三年九月

今上皇帝御極

諭總理事務王大臣各省民欠錢糧十年以上者已於恩詔內槩免徵收其餘民欠尙係應徵者朕思繼緒方新惟當繼述我

皇考惠養黎元之至意俾服田力穡之人均沐恩膏積
逋全釋若未蠲之項尙事徵收民間不無煩擾滋弊
茲特再行降旨於恩詔外將雍正十二年以前各省
錢糧實欠在民者一併寬免從前江南積欠錢糧內
曾有官侵吏蝕二項乃從民欠中分出者比時差往
大臣官員辦理原不妥協亦著照民欠例寬免爾等
卽交部遵行

乾隆元年六月二十八日奉

上諭上下兩江及江右鄉村五六月間連值陰雨山水
驟漲有水淹處所據各該督撫奏報朕已批諭速行

上元縣志

卷首

蠲賜

十一

賑恤安插今據總督趙弘恩將各被水情形具摺彙
奏朕又批令督率屬員盡心賑恤務使災黎得沾實
惠朕思江南江西被水鄉村雖係連陰驟漲止屬近
山近水之區然被災之家俯仰無資甚可憐憫所當
加意撫綏毋令少有失所其水勢旋即消退之地固
可補種雜糧而低窪積水之田不能插秧苗者更宜
確加查勘酌免本年額賦至房舍量加修葺籽粒應
否給助之處俱著悉心料理以副朕愛養元元之意
欽此

乾隆十年六月初六日內閣奉

上諭我朝

列聖相承深仁厚澤無時不加意培養元元以期家給人足百年以來薄海內外物阜民康共享昇平之福朕臨御天下十年于茲撫育蒸黎民依念切躬行儉約薄賦輕徭孜孜於保治之謨不敢稍有暇逸當守節用愛人之訓凡以爲民也今寰宇敉寧旣鮮糜費之端亦無兵役之耗所有解部錢糧原爲八旗官兵及京員俸餉之所需計其所給較之宋時養兵之費猶不及什之一二至于各處工程爲利民之舉者取給存公銀兩卽朕偶有遊幸賞賚所頒亦屬無幾是以左藏尙有餘積數年來直省偶有水旱朕加恩賑濟多在常格之外如前年江南被水撫綏安插計費帑金千餘萬兩凡此皆因災傷補救而沛恩澤者朕思海宇乂安民氣和樂持盈保泰莫先於足民况天下之財止有此數不聚于上卽散於下惟我

皇祖在位六十一年蠲租賜復之詔史不絕書又曾特頒恩旨將天下錢糧普免一次我

皇考旰食宵衣勤求民瘼無日不下減賦寬徵之令如甘肅一省正賦全行豁免者十有餘年此中外所共知朕以繼志述事之心際重熙累洽之候欲使海澨山

取一民一物無不均沾大澤爲是特降諭旨將乾隆丙寅年直省應徵錢糧通行豁免其如何辦理之處著大學士會同該部卽速定議具奏

乾隆丙寅年輪及江蘇八府州縣上元實被

恩施士民均戴於庚午年九月鳩工建亭於聚寶門外
雨花臺恭頌

皇恩浩蕩敬謹鐫石以垂永久

論曰天之生聖人將以開天下也當有明極壞之會非神聖文武之后撥亂世而反之正生民亦幾乎熄矣

上元縣志

卷首

蠲賜

三

世祖章皇帝定鼎燕京與民更始此視漢高帝入關告諭殆已過之

聖祖仁皇帝冲齡踐祚殄滅逆藩垂裳六十一載累洽重熙

世宗憲皇帝文謨武烈丕顯丕承今

皇帝陛下永言配命率祖攸行蓋其所以垂統錫羨歛福萬民者皇矣至矣上元縣知縣

臣藍應襲

謹拜

手而爲之賦

以光被四表爲韻

其詞曰伊昔

世祖肇造有邦拓金甌而鞏固調玉燭以燁煌入關而軫念如傷過漢祖之除秦苛法膺圖而聲靈丕赫類

武湯之正域四方平者天成者地奏蕭韶而舞干
羽修者府和者事揚大烈而覲耿光皇極之建旣
以無陂而無偏聲教之通乃以東漸而西被載傳
聖祖無爲恭已昧朝至日昃鰥寡惠鮮畿甸達要荒父母
孔邇方春和而賜復藹藹宣帝之勸農遇水旱以
蠲租汲汲仁宗之浹髓乃眷南都循江涘張翠蓋
駕龍艤開京坻兮取十千截淮泗兮儲釜錡披春
臺以一飽帝力何有於中天餐玉粒以無飢幽雅
類次於帝里由允恭而允塞二帝之華旣重自烈
祖而烈宗三王之勲可四逮我

上元縣志

卷首

蠲賜

古

憲皇天休用熾雲五色以紛綸麥兩岐而如織麟遊巴蜀
之區河清淮海之漉減浮糴兮虎邱人頌華封寬
積逋兮江東戶吟旣醉蓋我清之世有哲王而四
海於以在抱也

今上皇帝如天覆幬克寬克仁大猷聿紹討金川兮殄
厥渠獠巡岱宗兮升中禮昊士女欣欣雅考皞皞
何獨遺我

翠華用禱

制府黃公據情奉表惟

帝曰俞慰此襁褓屆辛未之春玉御和風而聆好鳥頌

思齊兮奉

文母展龍旂兮建鳳旒

上元縣志

卷首

蠲賜

十五

上元縣志卷首

南巡

聖祖南巡恩紀序

昔夏禹十三年於外荒度土功蓋為懷襄而出也
國朝漕河關係民生偶爾潰決則桃宿之民不安衽席
聖祖心憂之爰允河臣之請

翠華南幸循淮泗闔河工指授方畧順流東下達於會
城以上元為駐驛邑東峙孝陵則明祖之所避風雨
也迤邐雞籠之巔

御書曠觀二大字鸞停鵠峙則宋仁宗之飛白崢嶸也過
明故宮有禾黍之思焉城內屋宇周匝民苦號稅督

上元縣志

卷首

南巡

臣傅騰塔請

旨豁免

上可其奏見萬壽閣碑記中他若飭河臣訓守土等官存
問耆老賜貧民粟帛有差迄今讀

御製南巡筆記幾與虞書二典相表裏猗與何道之隆也

上元縣知縣

臣藍應襲

謹拜手稽手恭志

聖祖南巡恩紀卷二

上元縣志卷首

南巡

南巡一

康熙二十三年

聖祖仁皇帝南巡至於上元以將軍府爲行宮明日

躬祭明太祖陵

諭大學士明珠總督王新命明洪武陵寢歷經年世幸本朝加意護守鬱然無恙爾等可傳諭守陵太監及陵戶朝夕敬慎灑掃維勤登觀星臺望元武湖

賜題曠觀二字總督臣王新命敬鐫之石

御製

上元縣志

卷首

南巡

一

金陵舊紫禁城懷古

秣陵舊是圖王地此日鸞旂列隊過一代規模成往蹟六朝興廢逐流波宮墻斷缺迷青瑣野水灣環剩玉河治理艱勤重殷鑒斜陽衰草繫情多

燕子磯夜泊

巍峩一片江頭石千載人傳燕子磯疑有鼉鼉藏窟宅時聞鐘磬出山扉牙檣緩住寒烟淨羽衛周連夜火圍沙岸聲聲動行漏蘆花深處鴈驚飛

過金陵論

金陵禹貢揚州之域秦立郡縣爲秣陵兩漢因之孫

權時稱建業東晉及宋齊梁陳地號佳麗隋唐之間
六朝舊跡漸致湮沒南唐李氏始更築城名金陵府
明有天下建都於此窺明太祖之意以爲宅中圖大
控制四方千百世無有替也歲在甲子冬十一月朕
省方南來駐驛江寧將登鍾山酌酒於明太祖之陵
道出故宮荆榛滿目昔者鳳闕之巍峩今則頽垣斷
壁矣昔者玉河之灣環今則荒溝廢岸矣路旁老民
蹠而進曰若爲建極殿若爲乾清宮階礪陞級猶得
想見其華構焉夫明太祖以布衣起淮泗之間經營
大業應天順人奄有區夏頃過其城市閭閻巷陌未

上元縣志

卷首

南巡

二

改舊觀而宮闕無一存者覩此興懷能不有吳宮花
草晉代衣冠之歎耶昔人論形勢之地首推燕秦金
陵次之然金陵雖有長江之險爲天塹而地脉卑弱
無所憑依六朝偏安弗克自振固歷數之不齊或亦
地勢使然也明自文皇靖難之後嘗以燕京爲行在
宣德末年遂徙而都之其時金陵臺殿苑囿之觀聲
明文物之盛南北並峙遠勝六朝迨承平旣久忽於
治安萬歷以後政事漸弛宦寺朋黨交相構陷門戶
日分而士氣澆漓賦歛日繁而民心渙散闖賊以烏
合之衆唾手燕京宗社不守馬阮以囂僞之徒託名

恢復僅快私讐使有明艱難創造之基業未三百年而爲邱墟良可悲夫孟子曰天時不如地利地利不如人和有國家者知天心之可畏地利之不足恃兢業業取前代廢興之蹟日加儆惕焉則庶幾矣

南巡筆記

康熙甲子春日有以時值上元請行封禪及巡狩燔柴諸典禮者夫朕涼德菲躬臨御海宇邇年以來水旱兵戈民亦勞止雖邀天庇佑四海蕩平萬姓樂業實未有豐功偉烈足以昭示來茲何敢效法前人銘功紀德至於巡狩古天子所以周省侯國使諸侯肆

上元縣志

卷首

南巡

三

覲明堂考其政績今天下之權統一於內督撫之賢不肖朕皆得而知之又無事於巡狩之名也惟是近畿郡邑屢經巡幸補助時施而東南黎民風俗尚未周知乃於秋九月陳請

兩宮暫違定省二十八日出京師經河間過德州閱濟南城觀趵突泉題曰激湍百姓遮拜馬首口戶繁盛比屋可封昔稱臨淄之間肩相摩轂相擊者今尚有遺風焉十一日至泰山石徑峻嶒緩步登陟四十里御障崖瀑水懸流五大夫枯松猶在巖畔或亦後人繼植者入南天門捫秦時無字碑至孔子小天下處

真可收羅宇宙暢豁襟懷題普照乾坤雲峰諸宇宿
泰山巔月色清朗賦詩遣興來日登日觀峰看扶桑
日出下山祀於嶽廟嶽爲五方之長發生萬物故躬
祀之爲蒼生祈福十三日雨雪駐蒙陰縣侍臣云明
日小雪喜其應候詰朝雪霽望蒙山頂半入雲霧或
隱或見其上石衣土人攀縋取之名蒙山頂上茶嘗
考四川雅州有蒙山五峰極高峻土產甘露茶世所
傳者或雅州之蒙山也渡沂水取魚旣多且鮮因遣
使馳進

兩宮以志思戀之懷蒞花鋪青淮之界居人輻輳十八

上元縣志

卷首

南巡

四

日發宿遷縣閱黃河北堤岸一百八十里頻年水患
工役浩繁民俗罷敝不若山左之庶饒渡河舟行過
清江浦淮安府商賈往來舟楫如織寶應縣高郵州
邵伯鎮皆以湖水汎濫未復故道居人草屋臨流牀
竈半在水中朕甚憫焉登岸步行十餘里親察水勢
召集耆老秀才細訪其故皆云自海口壅塞水無所
歸二十年來田畝已成巨浸賦詩紀事思所以拯濟
之廿三日抵維揚市肆繁華園亭相望遊平山堂天
寧寺百姓持香夾道意甚誠敬平山堂乃宋臣歐陽
修所建修以文學侍從之臣出知揚州爲政之暇優

游談讌傳爲佳話故朕詩有文章太守心偏憶之句
廿四日將由儀真幸江寧府忽遇順風可以速達京
口遂乘沙船順流而下波恬浪靜瞬息七十里沙船
江中戰艦也自岳州長沙用兵以來多得其力今河
海清晏當時戰具僅供渡江之用然安不忘危朕於
此時未嘗不念艱難用武之際次早登金山孤巒隱
岫屹峙大江中飛閣流丹金碧照灼更有一峰離立
曰善才石郭璞墓在其西上有妙高臺留雲亭朝陽
洞下有中泠水稱天下第一泉朕率扈從諸臣一一
探眺縱目千里題江天一覽四字并賦二詩竹林禪

上元縣志

卷首

南巡

五

院在鎮江府城南五里曲徑逶迤茂林修竹高者四
五丈大者圍尺青葉碧枝陰森崖谷實北地之所未
有晚而登舟揚帆丹陽縣常州府無錫縣俱未及泊
一晝夜行三百六十餘里達姑蘇舟人云從無如此
之速者廿七日由楓橋入閶門登城閱視士民觀瞻
莫不抃舞有獻賦頌者是日駐驛城中念職事人役
辛勤遠來遍賞白金聽其各帶方物以示體恤廿八
日回鑿過虎邱山不甚高亭榭欄檻布滿其上千人
石高下可容千人傳爲生公講經處故旁有點頭石
劍池在夾崖中殊可觀平遠堂俯瞰虎邱之背田疇

林木望若錯錦蘇民仍列酒坊茶肆各安生業管絃
競奏覺有昇平景象然徒事紛奢罔知務本未若東
北風俗之樸實耳夜坐舟中與侍臣高士竒探論古
今興廢之跡或讀尚書左傳及先秦兩漢文數篇或
談周易或賦一詩每至漏下三十刻不倦日以爲常
蓋詩書意味深長不似耳目之好易於煩厭也舟過
無錫縣遊錫山觀惠泉石甃八角池水色淳泓味較
玉泉遠不相及不知前人何以稱之爲第二泉二十
九日由丹陽縣陸行初一日過句容縣蜿蜒石堤數
十里抵江寧府雨花臺在城南登之則江山城郭歷
歷可見報恩寺規制弘壯寶塔九級金碧琉璃盡鏤
梵相結構之巧殆竭人工非前代內帑所修不能至
此城中闐闐充實烟火萬家景物太平昔稱六朝佳
麗今亦不減大都也明日祭明洪武陵見其頽廢勅
地方官禁護之過明故宫僅存遺趾不禁慨然作過
金陵論并賦一詩登觀星臺望後湖題曠觀二字又
明日再遣使進

兩宮方物閱鎮將射於教塲頒賜扈從諸臣幣帛督撫
御衣初四日發江寧府泊燕子磯峭壁臨江亦有勝
致初十日閱高家堰堤工望洪澤湖汪洋千頃復由

河南岸行一百八十里過桃源縣十一日渡河至宿遷次日駐驛蒹花鋪自郟城沂州取道東兗渡沂濟祊汶泗水出陪尾山下泉林寺側石穴吐水衆泉俱導古樹成林有石碑刻子在川上處然闕里志載孔子觀川亭在尼山宣聖廟側未知孰是十六日長至節天氣晴暖無朔風祁寒扈從諸人莫不欣喜十七日過少昊陵顏子林駐驛曲阜縣南十八日黎明祀於闕里齋心穆穆若有所見禮畢坐詩禮堂命孔氏子孫講周易大學遍觀車服禮器及漢唐碑版檜樹在大成門內古幹蒼然苔蘚潤澤真靈蹟也敬想至

上元縣志

卷首

南巡

七

聖道冠百王前代留金銀器具皆人力可辦獨以仗前曲柄龍蓋留廟中并書萬世師表四字過闕里詩古槐賦北門醞酒孔子墓下伯魚墓在孔子墓東十餘步子思墓在其前西有子貢廬墓之所左有宋真宗駐驛亭林中竒樹葱鬱未可計數行三十里駐驛兗州府杜甫所謂浮雲連海岱平野入青徐是也念周公制禮作樂道接文武頃過曲阜未得躬謁廟庭特製祭文遣親藩代祀之遂由汶上東阿高唐至德州亟欲定省

兩宮兼程而歸是行也往返數旬所歷山東江南諸郡

縣日以周諮民隱體察吏治爲首務行道之頃復得
覽其山川憑弔古蹟至於地方利弊則將有以斟酌
損益焉率筆記之示朕之不徒事遊豫也

南巡二

康熙二十八年

聖祖仁皇帝南巡至於上元以織造府爲行宮督臣傅臘

塔奏免房稅奉

俞旨闔城臣民戴高履厚無以申祝謹於

御書曠觀亭之左鼎建

萬壽閣伐石立碑以紀其事詞曰

上元縣志

卷首

南巡

八

皇上御極二十有八年德懋化神湛恩汪濊武功旣訖
文事聿興庸稽古典常五載一巡狩于焉

玉輅重臨南土覃心懷保軫卹民依猶恐黎庶未曉意
指先於二十六年十一月二十六日

特諭部臣謂頻年以來各省錢糧雖以次蠲免江蘇所
屬各郡縣尤爲財賦重地額徵甲于他省且屢歲
輸將供億効力維勤茲用大沛恩膏除漕項外所
有二十七年應徵地丁等項錢糧俱著捐免二十
六年未完亦悉與豁除萬民間之懽忻舞蹈早荷
更生

上乃由山左達淮甸洞眎河工偏覽海岸又沛

特恩盡除江南全省積逋二百二十餘萬迤經浙水祀

禹陵回

鑾次蘇郡於二月十一日

諭南省崇文廣士飭吏賞軍赦過宥罪浩蕩洪膏不一而足二十有五日駐驛會城垂髻戴白填衢塞巷

普覲

龍顏呼聲雷動次日謁明太祖陵寢次日小較塲犒練俯從億兆暫止

鸞和四日是時人瞻日角屋漑恩波爲海隅所難遇洵

上元縣志

卷首

南巡

九

千載之一時旣已蠲租給復勞士賜酺溢及窮簷諮詢疾苦尙恐民害未除民生未遂一夫不獲致虛軫念時

駕臨燕子磯復

諭督臣永免房稅蓋自明萬歷三十四年操江丁賓府尹陸庚之以江南民間鋪面徵輸房號臨街又街篷搭租銀統名房稅民居僅有立錐徵收重疊其苦持茶已近百年于茲矣載荷

皇仁悉行捐免恩浮格外如解倒懸夫

聖駕經歷地方咸蒙嘉賚感戴所同至房稅一項則江

寧闔地累同間架苦切向隅一旦捐除實恩澤所
獨且帝舜五巡東至岱宗大禹四載南惟龠會我
皇上歷舜禹所歷之地無不以舜禹之心爲心重以內
安外攘開拓區宇駕軼百代東西朔南聲教四訖
而我

皇上俯念東南重地益切宵旰故前此之布德施惠至
再至三而今茲之減稅蠲租獨優獨渥闔城臣民
戴高履厚無以申頌乃于

御書曠觀亭之左鼎建

龍閣恭勒

至元縣志

卷首

南巡

十

聖諭永傳萬禩用祝無疆庀材鳩工悉由萬姓樂輸趨
赴恐後僅踰兩月告竣落成之日億萬老幼手額
山呼拱極規模干霄麗日猗歎休哉我

皇上通天下爲一體合上下以同情痾瘵民瘼纖微畢
鑒流行化育民無能名草野賤愚謹效康衢鼓腹
恭紀歲月于貞珉庶幾與帝堯濮州之碣大禹岫
嶺之碑並峙天壤于無窮云

御製

賜江寧文武將士宴於教場

瑞雲捧日曉初晴麗景天開羽仗明扈蹕赴桓多絳

灌分行俊譽盡瓊瑋三漿滿浥沾須徧五載南巡澤
再傾文穆武恬慙化理萬方無事宴昇平

再過明故宮

樓臺金粉已沉銷不獨詩人說六朝月落宮垣春寂
寂經過惟歎草蕭蕭

江寧駐驛

并序

江寧士民羣詣行在爭獻米穀兼羅果蔬涕泣請
留屢諭不止俯徇億兆之願勉遲信宿之行

心勤民隱獨諮諏不爲江山作勝遊白下回鑾期已
近黔黎擁道欲何求多憐野老堆盤獻勉就輿情兩
上元縣志

卷首

南巡

十一

日留二十八年宵旰意豈圖遠邇慕懷柔

後湖

淼淼長湖水春來發綠波飛鳴下鳧雁朝暮集漁蓑
登報恩寺浮圖

湧地千尋起摩霄九級懸琉璃垂法相翡翠結香烟
締造人功巧流傳世代遷曠然彌遠望萬象拱諸天
南巡三

康熙三十八年

聖祖仁皇帝南巡至於上元以織造府爲行宮

御製

駐驛江寧偶述

雲覆輕陰雨淨塵南巡又隔一經春山河舊數陪京
重士庶今看沐化淳古巷烏衣人已換芳洲白鷺跡
成陳元元億萬咸安樂教養休和屬大鈞

過明太祖陵有感

拔起英雄草昧間煌煌大業豈能刪玉魚金盃雖無
故烟霧低迷獨愴顏

月夜登燕子磯

石勢疑飛動江濤足下看天空來皎月風定歛奔瀉
綠樹燈光亂蒼厓夏夜寒經過覩形勝往往駐鳴鑾

上元縣志

卷首

南巡

一三

花山

警蹕來初地青山鳥道深風生松澗合雲暗石苔侵
靜晝飛閒蝶餘春噪晚禽空留支遁跡物外託宸襟
南巡四

康熙四十二年

聖祖仁皇帝南巡至於上元以織造府爲行宮遣

皇太子祭明太祖陵頒

御書治隆唐宋四字額陞賞各官有差賚貧民三月十

八日

萬壽恩詔朕爲天下生民主宵旰勤勞勵精圖治凡國

家之休戚間閭之樂利晷刻之間無不注意於此天下之大兆民之衆朕誰欺欺天乎至今四十餘載親歷饑饉者不知其幾南北用兵者不知其幾人心向背者不知其幾天變地震者不知其幾自責涼德不能撫育履冰臨淵兢業惟守仰賴

上天眷佑

祖宗厚德幸生創業未久之際方免墜失今海宇昇平年歲稍和生民俱已樂業邇來諸王大小臣工士庶因朕五旬輿情肫切屢請加上尊號朕堅意固辭不允所請蓋朕不以名譽稱揚爲尙惟以海內富庶爲

上元縣志

卷首

南巡

三

心是以屢蠲賦役頻省刑罰總欲使老安少懷風俗淳厚漸幾於康乂隆平之治近因淮黃告成乃東南要務再授方畧望有善後朕不辭勞瘁親往閱視見畿輔山左江浙等省耆老人民俱中心愛戴雖童穉亦咸歡欣瞻仰是知民心皆一用是益深軫念視切如傷所以星夜回鑾茲特大沛弘恩普施遐邇庶幾民生咸登壽域和協徧滿寰區所有應行事例開列於後於戲安民則惠益弘逮下之恩御衆以寬聿溥好生之德布告天下咸使聞知

南巡五

康熙四十四年

聖祖仁皇帝南巡至於上元以織造府爲行宮遣

皇太子祭明太祖陵三月十八日

萬壽昌期士民恭進

御饌

命翰林學士臣揆敘試士於秦淮棘院各賦詩二章取

士錢榮世等五人

頒明道書院接統濂溪額

賜原工部尚書臣熊一瀟訓忠堂扁額

御製夏日迎薰亭詩一首松花硯一方

上元縣志

卷首

南巡

古

南巡六

康熙四十六年

聖祖仁皇帝南巡至於上元以織造府爲行宮

御書朱子詩賜上元縣知縣趙聯捷

賜耆老肉帛有差時自夏徂秋不雨十月初七日

諭戶部江南地方頻年雨暘時若百穀順成閭井黎氓

咸得遂生樂業但民間夙鮮蓋藏禦荒無術一遇歲

歉卽有匱乏之憂朕屢次南巡素所洞悉今自夏入

秋雨澤愆期該督撫先後奏至因念小民久未被災

驟罹荒旱所關甚鉅隨命九卿等速同詳議應行事

宜業經勅令停徵并發倉穀賑濟顧倉儲數少難足
徧給惟各州縣截留漕米可以實惠及民目下時已
屆冬總漕桑格無事著會同總督邵穆布巡撫于準
親歷各州縣被災地方備加察勘將今年所徵漕糧
每州縣或留八九萬石或留十萬石酌量足支賑給
之數分別多寡存留支散及今漕米尚未開兌截現
收之糧以濟待哺之衆實於民生大有裨益此朕及
殷懷保赤子軫念如傷之至意爾部卽移文該督等
實心奉行仍開具賑濟實數奏聞特諭

論曰省方之典自唐虞以迄三代未之能易者也

上元縣志

卷首

南巡

十五

記曰命太師陳詩以觀民風命市納賈以觀民之
所好惡志淫奢辟是則省方也者所以觀民俗訓
臣工而澤務下究也

聖祖仁皇帝躬神聖文武之姿萃堯舜禹湯之德切齡茂
祚垂統六十一年仁恩滂洋太和翔洽

翠華所歷凡於上元駐蹕者六焉或間歲一舉或五年
一舉或十年一舉疏數因時賜蠲不已豈徒覽江
山之勝概侈祭告之隆規已哉 臣備員首邑承乏
舊都美盛德之形容編懿徽於簡裘乃踴躍忭舞
而頌曰

聖祖在上於昭于天躋躋王造敷繹東南匪曰時邁乃身
痼瘵天錫帝祉有開必先壘壘令德聖敬日宣徃
省南土倬彼甫田取陳食我民用惠鮮鍾山奕奕
王氣毗連洪武陵寢祀事告虔跨唐軼宋飛白書
懸夙厥河道瓠決形遷維

皇已溺距猷濟川王猷允塞畚鍤堤堅思齊文母

帝奉周旋龍舟盡鷁淮水滸浚昌期適會芝莛瓊
呼嵩祝耆老進筵

皇帝曰都予加一餐賜肉賜帛不飢不寒嗟嗟臣工
曠庶官民之攸暨申甫維賢上天眷佑

上元縣志

卷首

南巡

六

帝德罔愆施于孫子億萬斯年俾彌爾性車庶馬閑儀

刑

聖祖品物和誠

上元縣志卷首

今

上皇帝南巡恩紀

序

詩下武之首章曰世有哲王又曰三后在天王配于京以

國朝累葉準之自

世祖

章皇帝受命以逮於茲正世德作求之會矣我

皇

上單心夙夜適駿求寧將以辛未歲正月巡視江浙

先朔二日乘陽布澤

諭

免江蘇等郡民積欠二百八十萬有奇安徽等郡民

積欠三十萬有奇而申之以敷言董勸夫君之省方

上元縣志

卷首

序

七

也如父母入子之家室而民之於君亦如子之於父母望見顏色則喜荷其恩勤閔育則益喜國家垂祀百年

聖祖

軫念東南民力無歲不蠲無時不賜今

皇

帝鑾輿甫駕而綸綍聿昭下武之二章曰永言配命

成王之孚其斯之謂矣江南之民被無疆之休恤而

同心嚮道益急於惟正之供以無貽長吏謫其四章

日媚茲一人應侯順德又將咏謦嗟嘆之以為邑民

進一箴也上元知縣臣

藍應襲

謹拜首稽首恭志

今

上皇帝南巡恩紀

上元縣志卷首

皇帝南巡恩紀一

乾隆十六年正月初二日內閣抄出奉

上諭朕巡幸江浙間俗省方廣沛恩膏聿昭慶典更念東南貢賦甲于他省其歷年積欠錢糧雖屢准地方大吏所請分別緩帶以紓民力而每年新舊並徵小民終未免拮据朕宵旰勤勞如傷在抱茲當烈幸蒞蒞倍深軫切用普均霑之澤以慰望幸之忱著將乾隆元年至乾隆十三年江蘇積欠地丁二百二十八萬餘兩安徽積欠地丁三十萬五千餘兩悉行蠲

上元縣志

卷首

六

俾官無呈悞民鮮追呼共享昇平之福夫任土作歲有常經自應年清年款江蘇積欠乃至二百二十餘萬之多催科不力有司實不能辭其咎而疲玩成習豈民間風俗之澆漓尚有未盡革歟朕以初次南巡故特加恩格外嗣後該地方官務宜諄切勸諭加意整頓其在小民亦當漸除舊習勉効輸將勿謂曠典可希冀屢邀而惟正之供任其逋負也其浙江一省雖額賦畧少于江蘇而節年以來並無積欠豈犬牙相錯之地不齊乃至是歟此具見浙省官民敬事急公之義而江蘇官民所宜懷慙而效法也朕甚

嘉焉着將本年應徵地丁錢糧蠲免三十萬兩以示
鼓勵各該督撫其仰體朕惠愛黎元之意嚴飭所屬
實力奉行使閭閻咸沾實惠倘有不肖官吏以完作
欠希圖侵蝕察出卽行糾叅從重治罪並將此通行
曉諭知之欽此



